



## ***Komunikadu Imprensa***

***Periode*** : ***Agustu 2011***

***Publikasaun*** : ***05 Setembru 2011***

### **Lideransa Komunitária Sente Kontente Tanbá Hetan Treinamentu Konabá Sistem Justisa Formal**

Iha loron Sesta-Feira 19 fulan Agostu 2011, JSMP liu husi Unidade Asisténsia Legál ba Vítima ka (VSS) hala'ó treinamentu iha Suco Liurai, Sub Distritu Remexio Distritu Aileu. Partisipantes ba treinamentu ne'e maka hanesan xefe Aldeia, Lia Nain, Reprezentante Juventude Feto no Mane, Grupu Feto, Komunitade inklui Xefe Suco rasik. Total partisipantes sira hamutuk ema nian 37 ne'ebé kompostu husi mane 21 no feto 16.

Materi treinamentu sei nafatin hanesan treinamentus sira ne'ebé halo iha tempu hirak liu ba. Materia hirak ne'e maka Kódigu Penál, Kódigu Prosesu Penál husi prespetiva vítima violénsia bázeia ba jéneru, Lei Nú.7/2010 konabá Lei Kontra Violénsia Doméstika, nomós Lei Nú. 3/2009 konabá Lideransa Komunitária. Aliende materia konabá kuandru juridiku penál no prosesuál, treinamentu ne'e mós intruduz konabá provizaun balun iha Konvensaun Internasionál ratifikadu sira liu-liu Konvensaun konabá Halakon Forma Diskriminasaun Hotu-Hotu Hasoru Feto (CEDAW), no artigu balun kobre mós konabá provizaun balun iha Konstituisaun konabá Prinsipiu Estadu Direitu no Prinsipiu Igualdade Jéneru.

Nune'e mós kna'ar autóridade judisiariu hanesan (juiz no prokurador) nomós ajente prosesuál sira hanesan (Polísia - VPU, Defensór Públiku no Advogado/a) sira.

Treinamentu ne'ebé maka hala'ó iha Suco refere hetan pedidu ka rekomendasaun husi VPU Distritu Aileu tanbá siklu violénsia doméstika numeru maka'as iha suco refere.

Diretór Ezekutivu JSMP, Luis de Oliveira Sampaio haktuir katak, *Suco refere iha área remotas ne'ebé maka defisil atu asesu ba transporte no informasaun, tanbá ne'e treinamentu ne'e hanesan pasu ida importante tebes hodi dezamina informasaun ba lideransa komunitária atu nune'e bele kontribui ba prosesu prevensaun, protesaun no intervensaun urjensia hodi tulun vítima violénsia bázeia ba jenéru hodi asesu ba sistema justisa formal.*

Prosesu treinamentu ne'e hala'ó ho metudu diskusaun nakloke hodi bele involve partisipantes iha prosesu laran atu nune'e sira bele ativu no pro-ativu iha diskusaun laran.

Durante sesaun diskusaun iha treinamentu ne'e, partisipantes sira lamenta ho lei balun hanesan Lei Kontra Violénsia Doméstika tanbá tuir sira nia hare katak lei ne'e rasik la refléta situasaun real soseidade Timór Léste nian. Lamentasaun ne'e bázeia ba realidade ne'ebé maka durante ne'e sira hasoru iha báze, tanbá tuir sira nia interpretasaun katak lei ne'e rasik la fo valor ba lideransa komunitária nia intervensaun iha krime violénsia doméstika. Maibe

depoisde ne'e fasilitador koko hodi esplika konteudu husi lei ne'e, sira hatene ona oinsa maka lideransa komunitária sira nia partisipasaun iha prosesu hodi bele fo atendentu ba vítima violénsia bázeia ba jéneru iha sira nia suco laran.

Iha parte seluk Xefe Suco informa katak, *depoisde Timór Léste hetan nia indenpendensia, iha suco refere nunka hetan treinamentu konabá sistema justisa formal, tanbá suco ne'e iha área ne'ebé izoladu no defisil ba sira atu asesu ba transporte.*

Aleinde ne'e, *iha sesaun enseramentu nian Xefe Suco hateten katak, sira sente kontente tanbá bele hetan ona informasaun husi JSMP/VSS konabá sistema justisa formal atu nune'e sira bele kompriende oinsa no pasu saida maka sira tenke halo wainhira akontese kazu iha sira nia suco laran. Tanbá ne'e nia lori partisipantes nia naran hato'ó agredesimentu ba ekipa fasilitador ne'ebé maka fahe ona informasaun importante no sira sente katak informasaun hirak ne'e fo tebes benefisiu ba sira hodi nune'e sira bele halo separa ba kasu krime ho kasu sivil.*

Treinamentu ne'e realiza iha Suco Liurai, tanbá hetan suporta husi USAID liu husi The Asia Foundation.

Atu hetan informasaun kle'an favor kontaktu:

Luis de Oliveira Sampaio

Direitor Ezekutivu JSMP

Email; [Luis@jsmp.minihub.org](mailto:Luis@jsmp.minihub.org)

Landline; 3323883/7295795